

GV-Bericht

vom 27. Februar 2015

So schnäu isch das erschte Jahr verbi gange. Ds erschte Jahr wo d'Sändle, d'Tanja und ig d'Leitig vo de Aktive hei überno. Es isch es Jahr vouer Ereigniss und Neuerige gsi. Ds Tätigkeiteprogramm isch vougstopft gsi mit Termine.

Agfange het aues mit üsere erste Turnstung im Januar letscht Jahr. Mir hei üs d'Arbeit so ufteilt, dass d'Sändle sich vorwiegend ums Administrative kümmeret und d'Tanja und ig abwächsligswiis d'Trainings leite.

Nach es paar verschwitzte Turnstunde isch de scho ds Trainingsweekend ändi März vor dr Türe gstange. Mit de Froue zäme simer wider in Gstaad gastiert. Mir hei dänkt, aus neus Leiterteam müesse mir nüt neus afa, u si bir autbewährte Gstaader Turnhau und bim 5-Stärne-Spaghetti-Koch Res doch am beschte ufghobe. Die super Wätterverhäutnis heis üs erloubt, viu dusse z'sii, so isch üs d Huedili nid ufe Chopf gheit bi sooo viu Froue uf eim Huufe. Mir hei aui zäme viu trainiert u gschwitzt, aber z lache und ds mampfe isch o nid z'churz cho! Mir hei es super Trainingsweekend erläbt.

Chuum simer wider zrügg gsi vo Gstaad het in Stude scho e angere Wind gwäähht. Eine, wo eim ds Sagmäu id Nase gstübt het. Ds Seeländische Schwingfescht isch aagschwunge worde und aui hei i jedere mögleche Sparte tatkräftig mitghoufe.

Nachem Schwingfescht isch de scho glii ds Turnfescht in Orpung cho. Mir hei mega viu derfür trainiert und jedi Turnerin het a däm 21. und 22. Juni ihres beschte gä. Leider hets de glich nid für die Resultat glängt, wo mir üs eigentlech erhofft hei. Derfür isch dr Aabe ir Bar umso „beruuschender“ gsi! (So nachem Motto: Atemlos durch die Nacht) ;-)

Das Turnfescht isch ds letschte aber o ds erschte i dere Form gsi. Ds letschte i dere Konstellation, wöu sich üsi Rige nach de Summerferie trennt het aber o ds erste, wo mir aus neus Leiterteam hei dörfe erläbe. Merci no einisch a aui zäme für eue super iisatz!

Nach de Summerferie, am Wuchenend vom 16. u 17. Ougust het d Wanderig is schöne Val de Travers stattfunge. Es grosses Merci ad Organisatorinne für das super Wander-Weekend!

Dür d Gründig vor Aktive+ Rige si mir jetz nüme ganz so viu i dr Halle gsi wie vor de Ferie. Es isch chli es dra gwöhne gsi, aber derfür hei mir jetz meh Platz ir Halle. Ar Standortsitztig hei mir gluegt wies i üsere Rige witer geit, hei üs für ds nöie Turnerjahr einigi Ziel gsteckt, und usgmacht i welne Diszipline mir am nächste Turnfescht wei starte.

Aber bevor mir wider für ds Turnfescht hei chönne trainiere, hei mir zersch aus Flight Attendants mit dr Love Air bis uf Australie dörfe flüge.

Ds Soirée isch einisch meh e riise Erfoug und guet bsuecht gsi.

Ds Jahr 2014 hei mir ar Wiehnachtsfiir, zäme mit de Froue im Walduus in Worbe abgeschlosse. Bim gmeinsame Zämesii heimer fein gässe und üs guet ungerhaute.

U so schnäu isch üses erschte Leiterjahr verbi gange. D Sändle, Tanja u ig wei üs i däm Sinn nomau hätzlech bi euch bedanke für eue Ehrgiiz, euii Motivation und eue iisatz. Ou im neue Jahr freue mir üs wider druf, mit euch chönne z'trainiere und euch zum schwitze z'bringe.

Eui Leiterinne

Sandra, Tina und Tanja